



TAPAK 7

PM Modi-i COP26 tir den
ajurutepa sensak asem

TAPAK 3

Meghalaya nung load shedding
anener: Conrad Sangma

VOL. XVIII NO. 124 (ADOK 124) DIMAPUR

RASEMNÜ (WEDNESDAY) TSÜKLAI (FEBRUARY) 17, 2021 ₹ 5.00

Tanü nungi NH 29 nung gari ajak senzütsü

Dimapur, February 16 (TYO): February 17, 2021 nungi Chathe River Bridge (Patkai Bridge) nungi Kukidolong tashi gari ajak senzüdaksütsü, ta Dimapur DC-i metetdaksüogo.

Tanga osang ka magütsü tashi February 17, 2021 nü anepdang 5:00 ako nungi nikongdang 3:00 ako tashi

garitem senzüdaksütsü, ta paisa ashi.

Ajisüaka, senzüsenbonger ajaki traffic tetuyubatem sülen anidaksüla aser garitem tsüingda meter 30 bosa tetsüingda ayutsüla. Iba lenmang nung traffic ketdangsürtemi jungjunga mita reprangtsü, ta Dimapur DC-isa metetdaksüogo.

COVID-19 Nagaland: Nisung 97.68% taneptsü nguogo

Kohima, February 16 (TYO): Mongulbarnü Nagaland nung nisung ka dak COVID-19 aliba putet aser nisung 16 taneptsü angu.

"Tanü Dimapur nung nisung ka dak COVID-19 aliba putet aser Kohima nung nisung 16 taneptsü angu" ta Health & Family Welfare Minister, S Pangnyu Phom-i metetdaksü.

Nisung 12,190 nungi parnok 11,908 taneptsü nguogo, ta paisa ashi.

"Mongulbarnü Dimapur nung COVID-19 puteta alir nisung 2 asüba züingsema Nagaland nung nisung ajak agi 90 süogo. Ajisüaka, nisung 10 bo tanga timtem ajanga asü," ta Health & Family Welfare Director, Dr Denis Hangsing-i metetdaksü.

Nagaland nung COVID-19 aliba puteter nisung 151 tashi tanga state

temi ogo aser taneptsü angubaji 97.68 lir, ta paisa ashi.

Tang anepalurtem rongnung Dimapur nung nisung ka dak shirangba yimya tera lir, saka tanüingba nisung 40 dakboshirangba yimya kecha mali, ta Dr Hangsing-isa metetdaksü.

Taneptsü angurtem: Dimapur (6,329), Kohima (3,779), Mon (594), Peren (506), Tuensang (246), Mokochung (183), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,28,499 tendangogo. RT-PCR ajanga sample 74,497, TrueNat ajanga sample 37,275 aser Rapid Antigen Test ajanga sample 16,727 tendang" ta Dr Hangsing-isa ashi.

AYO aser CYO-i 4 lane yangluba nung ashishiteper

Dimapur, February 16 (TYO): NHIDCL-i ketdangsüa four lane highway yangluba mapa nung temolung masür, ta Angami Youth Organisation (AYO) aser Chakhroma Youth Organisation (CYO)-i metetdaksüogo.

Iba atema asüingdangtepa aodang NHIDCL-i temolung magütsüba aser tebilemstsü mabenba osang angazükogo. Tanü tashi nung parnoki kuli shitak ka danga magütsüi arur, ta AYO aser CYO teloktemi ashi.

Iba dakji alia, Dimapur district administration aser State sorkari iba mapa metembangba atema lenmang yangluba company dak dang tai

metongloksütsüla. Tawa lung anenzüka aliba lendong atalokba tu mataloktsüsa mapa inyaktetsü, ta parnokisa ashi.

Patkai Bridge aser Kukidolong tsüingda lenmang nung ali talila nüingdaker saka lenmang ulushitsü atema ali tila ka dang agüja lir ta osang angazükogo. Anungji, state sorkari item tebilemstsü asoshi temolung agütsütsüla ta parnokisa metetdaksüogo.

Kobi melii tzüingluruwa atongtsü anungji tang teinyaktsü shitak meinyakra, khuret ajurutsü, ta CYO tir Seyieneilhou Keyho aser AYO tir Kekhrie Pfkukha nati külem sangdong ka nung metetdaksüogo.

Meghalaya sorkari totzü nung VAT ajemer

Shillong, February 16 (Agencies): Meghalaya sorkari Mongulbarnü petrol litre nung Rs 5.4 aser diesel litre nung Rs 5.1 ajemogo.

Totzü jenjang tasen ya Mongulbar ayaterm nungi amshitsü.

Meghalaya nung para agia senzüba gari kiburtem aser driver temi totzü jenjang kanga atuba anema lungkak aityonga arur aser iba atema tanü Chief Minister Conrad Sangma menden ser Cabinet senden ka amendang telemtetba agiogo.

Sorkari petrol aser diesel nung tax agiba ajanga state nung senotsü bendenba nung yariogo, ta CM Conrad Sangma-i ashi.

"State nung senotsü khuret liaka, sorkari petrol nung VAT 31.62% agia aliba nungi 20% dang agitsü. Ibaji litre nung Rs 17.60 agiba nungi Rs

15 dang agitsü" ta pai ashi.

"Maneni diesel nung VAT 22.59% agiba nungi 12% dang agitsü aser ibaji litre nung Rs 12.50 agiba nungi Rs 9 dang agitsü" ta Conrad-isa metetdaksü.

Sorkari totzü nung VAT ajemba ajanga Shillong nung petrol litre nung Rs 91.26 agiba nungi Rs 85.86 akümtsü. Ano, diesel litre nunga Rs 84.23 nungi Rs 79.13 akümtsü" ta paisa shisem.

Meghalaya sorkarisa tawa tu diesel aser petrol litre shia nung Rs 2 ajema liasü.

CENTRE SORKARITAX ONSARA AGIR:

2014 küm Centre nung BJP sorkar akümba sülen nungi petrol aser diesel nung taxes, duties aser commissions 133% tashi ajungketogo.

May 2014 nungi February 2021 tsüingda Centre sorkari totzü nung tax 217% tashi agir.

PRICES CATEGORY	MAY 2014	FEBRUARY 2021
Base price (in Delhi)	Rs 47.12	Rs 29.34
Central tax	Rs 10.39	Rs 32.98
State tax	Rs 11.90	Rs 19.92
Dealers' commission	Rs 2.00	Rs 3.69
MRP	Rs 71.41	Rs 86.30

CM Rio-i Naga yimten tebilemstsü atema ajak longjemtsü ayongzüker

Dimapur, February 16 (TYO): Mongulbarnü NLA session nung Naga yimten tebilemstsü atema olemtepdang Chief Minister, Neiphiu Rio-i küm noklang ka tashi Naga nung ajak atema iba tebilemstsü ya kanga tongtipang süa arur ta ashi.

"State nung Nagaland Legislative Assembly ya tematiba sabang lir aser Assembly-i Naga nung ola aser taginüba abener. Anungji, Naga yimten tebilemstsü atema nübortemi ola adokba aser aginüba indang asenoki lemsatepsüla" ta paisa metetdaksü.

CM Rio-i Naga yimten atema inyaktsü tenzüka putiotsü tatsüka lemsatepdang 1918 küm 'Naga Club' tentetba ashi.

"Iba sülen nungi küm noklang ka tsüingda mapa aika inyaktetogo aser iba ajanga Indo-Naga yimten tebilemstsü atema lenmang tajungba lapoktsüogo" ta paisa ashi.

Tanü India sorkari Prime Minister jenjang nung Indo-Naga yimten olemtep agia arur aser India sorkarisa Naga yimten aser putiotsü khenyongi balaka ta asüba agizükogo. Iba tangatetba nung tesüba küm 20 tema olemtepa arur, ta Rio-isa shisem.

"August 3, 2015 nü India sorkar aser NSCN (IM) tsüingda Framework Agreement nung sign sütep aser November 17, 2017 nü India sorkar aser NNPGs tsüingda Agreed Position nung sign sütepogo aser iba atema pelar. Ano, Overseas Nagas den Consultative Meet (NCM) aliba aser 2009 küm Joint Legislators' Forum (JLF) tentetba ajanga Naga yimjung maparen nung teyari kanga nguogo. Maneni, October 15, 2020 nü Kohima nung state sorkari kin hohotem, civil society teloktem, arogotem, political party tem, ex-parliamentarians aser public lennirtem den senden amendang onük 7 bangzüngtepa liasü" ta CM Rio-isa ashi.

"Naga nungeri agizükba yimten latetba ajanga rongsenkettsüing inloktsü, terenlok alitsü aser asen lanurtem asoshi mapa aika adoktsü. Iba ama tongtipang mapang ka nung Naga loktilibai longjemmer ola ka dang adoktsüla aser asen lokti alenbanga aliba salatsü atema merangtsüla" ta paisa ayongzü.

"Asenok tsüingda mangatetep alibatem yutsütsüla aser ka küma longjemmer, asen lima aser tanurtem atema mapa külemi inyaktsü

ayongzüker" ta Rio-isa metetdaksü.

Paisa kidanger state nung alirtem dang yimjung maparen tiptema tembangtetsü atema yariteptsü mepishia metetdaksü.

"Naga yimten tebilemstsü atema küm noklang ka jungnüa inyaka arudang civil society teloktem, kin hohotem, arogotem, Forum for Naga Reconciliation, NGOs aser Naga Political party temi yaritepa aruba atema tenüngsang agütsür aser maneni Naga nung longjemtsü atema inyaktsü ayongzüker" ta CM Rio-isa metetdaksü.

NAGAYIMTENTEBILEMSTSÜ ATEMADRAFTING COMMITTEE KATENTET:

February 16, 2021 nü 13 buba NLA session tenetbuba nung Speaker Sharingain Longkumer-i Naga yimten tebilemstsü atema Drafting Committee ka tentetogo.

Drafting Committee üngsemtem:

- * **NDPP:** Toshi Wungtung aser Neiba Kronu
- * **BJP:** Pangnyu Phom aser Jacob Zhimomi
- * **Independent:** Tongpang Ozukum
- * **NPF:** Dr Chotisu Sazo aser Imkong L Imchen

Sen maliba ajanga Foothill Road meyangluteter: Y Patton

Kohima, February 16 (TYO): Centre nungi Special Plan Assistance (SPA) manguba aser state-i senotsü peria mengutetba ajanga Foothill Road metembangteter, ta Deputy Chief Minister Y Patton-i tanü ashi.

Assembly session nung Y Patton-i Foothill Road atema jembidang "Assam majangi gari lenmang yanglutsübaji mapang talangka nungi nüingdaker saka iba ya ano metembangteter. Iba mapa shitak meinyaktetba ya state ket nung senotsü peria maliba ajanga lir. Ajisüaka, state sorkari iba mapa ya asangsang nung tembangtsü aser iba atema India sorkar den jembitepa arudar" ta ashi.

Nagaland-i Assam den arrtsütepa lir aser ibaji Mon, Longleng, Mokochung, Wokha aser Dimapur district tem nung lir. Anungji iba lenmang yangluba ajanga lokti aser rongsenkettsüing tsütsü temelenshi aika bentsür arutsü, ta paisa ashi.

2012 küm State sorkari Foothill tesemtem nung lenmang yanglutsü sentong atong. Iba atema tang aliba lenmangtem amshia tongtipang lenmang ka yanglutsü sentong atong, ta paisa shisem.

Iba nung ajemdaker Tizit-Naginamora-Tuli-Yajang C - Longtho-MI Project- Sumito - New & Old Wozhu-Changpang-Yimpang-Bhandari-Governor's camp-Ralan (O)-Niuland - Dimapur tashi gari lenmang yanglutsü/anglushitsü atema benok aser kilometer 342 talang lenmang ya Rs. 236 crores endoka yanglutsü benoka liasü, ta Y Patton-i metetdaksü.

"Iba mapa ya Special Plan Assistance (SPA) kübok

inyaktsü atema 2013-14 mapang India sorkari molunga agizük aser Rs. 235 crores lemmzüksü. Iba nungji ajemdaker 2013-14 nungi sen lemmzüksüba ama masü saka budget nung lemmzüksüba ama mapa tenzü" ta paisa ashi.

Approved budget: 2013-14: Rs 4000 lakhs; 2014-15: Rs 2700 lakhs.

Ajisüaka, tesasatsüka 2015-16 nungi SPA sen agütsüba anenadok aser iba jagi mapa inyaktsü yanglua aliba ama meinyaktet. Budget nung lemmzüka aliba ama kilometer 129.60 atema Road Formation Cutting/ Embankment inyak aser Governor's camp anasa Doyang ayong nung 2-lane RCC bridge (134.80 M Span) yangludar, ta Patton-isa metetdaksü.

Iba apu yanglutsü atema March 2014 nung mapa lemmzüksü saka SPA funding maliba den tanga onüktem ajanga 2017-18 nung Contractor-i mapa anen saka tang iba mapa tenzüka inyakdar, ta paisa shisem.

Doyang nung apu 70.66% tashi inyakogo aser senotsü angulen meliaka, contractor-i akokba tashi iba mapa inyakdar, ta paisa metetdaksü.

Iba lenmang nung anentsüh aser ali anenzüka aoer aser senotsü peria manguba ajanga 2015-16 nungi mapa tasen meinyaker. Ajisüaka, gari senzütsü atema department-i Doyang apu yangluba densema tanga maparen inyaktsü atema Rs. 143.67 crores meshiogo aser ibaji tang reprangtepdar, ta Y Patton-i ashi.

Kasa mapang nung, state sorkaria India sorkar den SPA kübok senotsü agütsütsü atema

jembitepdar, ta paisa shisem.

2014-2015 nung state sorkari Ministry of Road Transport and Highways (MoRTH) dang Foothill road ya National Highway ka asütsü asüingdang, saka MoRTH-i Trans Nagaland Highway (Two Lane) ta ajatsü aser shilem lemsar inyaktsü tebilemba lemsatep.

Iba tangatetba nung ajemdaker Phase I: Tuli nungi Dimapur by-Pass 180.65 km, Phase II: Tizit nungi Tuli- 68.00 km aser Phase III: Jalukie - Khelma - 71.60 Km (Dimapur nungi Jalukie tashi National Highway 129 A ajanga sendaktepa lir).

Phase I aser II indang feasibility report aser Rs 4463.56 crores DPR MoRTH nem agütsüogo aser ibaji December 2018 nung agizükogo. Trans Nagaland Highway ya National Highway ta sangdongtsüba atar aser iba atema state sorkari aiben nenshiogo, ta Patton-i metetdaksü.

Iba lendong ya National Highway ka kümdaktsütsü atema September 3, 2020 nü Nagaland Chief Minister, Neiphiu Rio-i India Prime Minister dang shiogo.

Phase II kübok Jalukie nungi Athibung tashi feasibility study tembangogo, saka Athibung nungi Khelma tashi ano metembang lir, ta paisa ashi.

"January 19, 2021 nü Nagaland Chief Minister-isa Union Minister, Road Transport and Highways den iba mapa ya Bharatmala Pariyojna project kübok inyaktsü atema shidangogo. Sorkari tarutsü anogotem nunga iba tongtipang mapatong atema maneni teyari bushia inyaktsü" ta Y Patton-isa metetdaksü.

Dimapur nung ATMA Governing Board senden menogo



Deputy Commissioner, Dimapur indang Conference Hall nung February 16, 2021 nü ATMA Governing Board senden ka amenba mapang tangokba noksa nung angur.

Dimapur, Tsüklai/February 16 (TYO): Deputy Commissioner, Dimapur, Rajesh Soundararajan IAS, shiba ATMA Governing Board indang mendenpuba lir, pai Governing Board züngsemtem den senden ka February 16, 2021 nü Deputy Commissioner, Dimapur indang Conference Hall nung jazüka liasü.

Iba senden nung ATMA Governing Board mendenpubai züngsemtem dang aluyimer ajungtsü aser ajangzüksü mechi sentong balala yangluba takok ngutetsü asoshi Agri and Allied convergence inyaksangshi nung

tali temolung agütsütsü ajungshia liasü.

Pai züngsemtem dang integrated farming amenoktsü atema awareness tali agütsütsü aser tang amenoka alibatam talu tuluba kumdaktsütsü atema ayongzük.

Tashidak wara mechi mapang indokba sasa jembiba mapang, mapang amajok nung indokba tatongi arudaktsütsü mechi tang teinyaktak mapatem nung temolung agüja mapa tem takok ngua inyaktsü ayongzük.

Iba senden nung tang teinyakdak mapatem aser DAP yangluba jenjang asadanga liasü.

Mozü mamshiba aonsotsü tabu balala adokdaksütsü atema atsüki anepalutsü ya kanga tongtipang, ta shia senden nung adener aluyimer kati ATMA dang training agiba mapang atsüki anepalutsü atema awareness agütsütsü nungdak, ta shia liasü.

Iba senden nung District Agriculture Officer, Member Secretary cum Treasurer Governing Board Dimapur, Atoi Sema, Agri and Allied sectors nungi Governing Board züngsemtem aser Governing Board nung ketdangsür masüba züngsemtem dena liasü.

Phek nung HSLC kaketshir atema ita ka maths coaching agütsür



High School Leaving Certificate (Class 10) agütsütsüpur kaketshirtem den District Administration & District Level Centre for Women - Mahila Shakti Kendra (BBBP), Phek ketdangsürtem külemi February 15, 2021 nü tangokba noksa ka yangi angur.

Dimapur, Tsüklai/February 16 (TYO): High School Leaving Certificate (Class 10) tatidang agütsütsüpur nem ita ka mathematics coaching agütsüba sentong ka Beti Bachao Beti Padhao kübok Government Higher Secondary School, Phek nung February 15 nü tenzükogo.

HSLC Ezamination 2021 agütsütsüpur kaketshirtem temolung uludaktsütsü mechi iba sentong ya District Administration & District Level Centre for Women - Mahila Shakti Kendra (BBBP), Phek ajanga ayongzükba lir, ta DA & DLCW MSK, Phek ajanga sangdong ka nung ashi.

Deputy Commissioner, Phek, Razouvolie Dozo-i ashiba agi, tashidak wara mechi kaketshir azüngba aser bushiba nung kongshiba mechi parnok yaritsü atema iba coaching camp ya ayongzük.

District tesem ajungalen mathematics junga mangazüktetba ya tebilemtsü ka lir, ta Deputy Commissioner-i ashi. Anungji kaketshirtem temolung uludaktsütsü aser marks tajung ngudaktsütsü

mechi administration ajanga Beti Bachao Beti Padhao kübok iba mera ya agi.

Iba coaching camp lapokba sentong nung jembiba mapang, N Bhavani Sri, IAS, SDO (C) Nodal Officer BBBP, Phek ajanga kaketshir dang nukjidong ayutsü, aser teti meranga azüngtsü ajungshia liasü.

Iba coaching angati agütsüba mapang kaketshirtemi angazüksü merangtsü aser tajangzük tulu angutsü imlar, ta lai ashi.

Ita ka coaching agiba mapang meranga azüngtsü aser züngzünga coaching nung adentsüla, ta N Bhavani-i ayongzükba liasü.

Laisa kaketshir dang lesson azüngba ya pei teinyaktsü mapa ka ama masü saka tejangraba ka ama agizüksü shia liasü.

Analytical skills yangertsü atema mathematics ya kanga tongtipang lir aser UPSC, CAT, GMAT amala competitive exam tem nung takok angutsü atema aptitude ya kanga tongtipang lir, ta lai ashi.

Kaketshirtemi iba maongka agia tatidang asoshi

renemshitsüla aser takok tajung angutsüla, ta Government Higher Secondary School, Phek indang Principal Kewetshete Wezah-i ashi.

Pai kaketshirtem dang coaching class nung adentsü atema kisüing mamrutsüla saka nukjidong yur iba nukjidong angatetsüla, ta ajungshi. School balala nungi süaka kaketshirtemi mangatetba asündangtsü aser asükum yimya mamshitsü atema pai ayongzükba liasü.

Iba coaching atema tesayur ya Ashok Kumar B.Sc. Maths, B.Ed aser Kezevituo Chielie M.Sc. Maths, B.Ed na alitsü. Iba angati coaching class nung adentsü atema Phek district kübok kaketshir reju balala nungi kaketshir tenüing 200 shi agüja lir.

Anogoshi telok ana lemsar coaching ya agütsütsü, aser class ya nikongdang 3:30 ako nungi 5:30 ako tashi alitsü.

Coaching class tenzükur mezüing anogo kaketshir ajunga nem note book, pen, mask, hand sanitizer aser süngojemtsü agüja liasü. Iba coaching class ya March 15, 2021 nü tembangtsü.

ASLB ajanga metetdaksür

Dimapur, Tsüklai/February 16 (TYO): Taoba Aenjeti 20-22, 2021 tsüngda Ao Senden Literature Board-i achaayanga agiba Arangtet Tatidang takoker osang tang

Tsüklai 18, 2021 tashi nung adoktsü maparen tembanga arudagi, ta I. Temjen Tzudir, ASLB-AC Secretary ajanga osang ka nung metetdaksüogo.

Dimapur police-i ozüing nungaibeleneritem apu

Dimapur, Tsüklai/February 16 (TYO): N.L. Road, Dimapur nung shishilembar dang senotsü meshiba mechi Dimapur police-i Surumi, Zunheboto nungi tang Toluvi Village, Dimapur nung telidak arishi küm 26 tain Khetovi Aye Rajapeyu (NSCN-K) apu. Iba dak sendakba nung ken o ka

13, 2021 nü Chumoukedima nung alir arishi küm 26 tain Bendangmeren Ao pua liasü. Pa ket nungi brown sugar südi ta temolung melemtetba oset tuozük gram 7 ngutet. Iba dak sendakba nung ken o ka Diphupar Police Station nung benoka lir.

Maneni New Market area, Dimapur nung aonsotsü ayoker dang nungi sen saruba mechi tang Sachu Colony, Dimapur nung telodak arishi küm 35 tain Itovi Yepthomi apu. Iba dak sendakba nung ken o ka West Police Station, Dimapur nung benoka lir.

Dimapur police-i February

February 04, 2021 nü 4th Mile area, Dimapur nung ganja südi ta temolung melemi bilemba oset tuozük seret 11 bener lia arishi küm 35 tain Mughavi pua liasü. Iba dak sendakba nung ken o ka Diphupar Police Station nung benokogo, ta sangdong ajanga ashi.

Kuhuboto Police Out Post anüker police temi February 12, 2021 nü ayuaba Bolero gari ka ngutet. Iba gari ya Dispur Police, Assam nem agütsüogo

NLA Complex kübok Thizama lenmang shibangtsü

Dimapur, Tsüklai/February 16 (TYO): Nagaland Legislative Assembly Complex nung kongshia anentsüh aluba atema Nagaland State Disaster Management Authority (NDSMA), Home Department ajanga rock boltong asoshi February 17, 2021 nü nungi tenzükba machinery tulutem Nagaland Legislative Assembly Complex kübok Thizama road nung ayutsü, ta sangdong ka ajanga ashi.

Anungji nüburtem timtem

majurutsü asoshi aser NSDMA iba mapa tiptema inyaktsü mechi Nagaland Legislative Assembly lemjem nungi Thizama tashi lenmang ya February 17, 2021 nungi tarutsü nung osang magütsü tashi shibanga alitsü. Anungji senzüsempontertemi temelen lenmang NPSC Office junction - Planning Quarter road - Pruzie Shisha Hoho Prayer Centre entry gate - 4th NAP Bn. camp, Thizama nung jajatsü ajungshir, ta sangdong ajanga ashi.

Jalukie nung ki ka rongdok



Dungki village, Jalukie nung Fire Personnel temi mi remseppa mapang tangokba noksa ka yangi angur.

Dimapur, Tsüklai/February 16 (TYO): Dungki village, Jalukie nung kitsük-kirong lendong adoka lir ta February 15, 2021 nikongdang 2:00 ako nung osang aruba sülen Fire Station Jalukie nungi Fire & Emergency Services team pur mi ya remseptsü ao.

Mibener temi osettsüset aser hadir teberi bener oa mi remsepa liasü. Iba mapang ki ka den yangji aliba oset ajunga rongdoka liasü. Iba lendong

nung sen lakh 3.58 jenjang osettsüset rongdoka liasü.

Mapang shidak nung tongla-tongsünga aser teyari agütsüba ajanga iba lendong tuluba mükumdaktsüi aziükteta liasü. Fire team-i iba mi remseptsü minute 30 agi.

Electrical short circuit nungi mi ya adok südi, ta temolung melemi lir, saka iba lendong nung asü-ama meliasü. Iba mibener ya Duty Commander ASI Kevichütuo Zumvü-i anir liasü.

Mizoram nung Rs. 8 lakh alangba heroin apu



Aizawl, February 16

(Agencies): Mizoram nung Myanmar nunger ka dena nisung ana ket nung heroin bena aliba atema puogo.

Tena ket nung Rs 8 lakh shi alangba heroin bena liasü.

Osang tejangja ka angazükba sülen, excise & narcotics department ketdangsürtem aser Assam Rifles sepaitemi Zokhawthar yimtsüng nung heroin gram 237.5 ngutet, ta excise &

narcotics department spokesperson Peter Zohmingthanga-i ashi.

Zokhawthar yimtsüng ya Mizoram-Myanmar arrtsü anasa lir.

Iba mapang Champhai Bethel Veng nung alir arishi küm 35 tain R. Lalrinkhuma apu. Pa ket nungi apuba heroin ji Rs. 6.30 lakh shi alang liasü, ta Zohmingthanga-i metetdaksü.

Ano, excise & narcotics

department ketdangsürtem aser Assam Rifles sepaitemi Zokhawthar nung Rs. 1.75 lakh shi alangba heroin gram 68.6 apu, ta paisa ashi.

Heroin bena alisangji arishi küm 41 tain Vanlalngheeta lir. Pa ya Myanmar kübok Chin state nung Khawmawi nunger lir, ta Zohmingthanga-isa shisem.

Tenaprong The Narcotic Drugs & Psychotropic Substances Act, 1985 kübok tai tongloktsüogo, ta paisa ashi.

Assam nung Congress-i Anti-CAA Memorial yanglutsü

Guwahati, February 16

(Agencies): Assam nung Congress nem sorkar akümtsü tashi agütsüra CAA (Citizenship Amendment Act) anema Memorial ka yanglutsü ta nangzükogo.

Assam Assembly Elections nung Congress-i tongti süa jembiba onüktem rongnung CAA ya ka asütsü ta parnokisa ashi.

CAA anema lungkak aiteremi Assamese jenjang kümzüka ayutsü atema taküm bendanga agütsüba atema Guwahati nung memorial ka yanglutsü ta Assam Congress-i ashi.

"Congress-i election nung takok anguba sülen CAA anema lungkak aitba indang memorial ka yanglutsü. Assam-i CAA maginür" ta

Congress lennir aser Assam nungi Lok Sabha MP Gaurav Gogoi-i ashi.

"Election nung takok anguba sülen CAA anema memorial ka yanglutsü. Iba memorial ajanga Assam nung nübortemi CAA anema inyaka aruba, lungkak aitba kentem mejema atenba aser noksatem yangluba tushitsü" ta Congress Lok Sabha MP aser Congress campaign committee Chairman Pradyut Bordoloi-ia ashi.

"Taruba ita ishika sülen Guwahati nung nüngshilung tasen ka angutsü. Taruba Congress sorkari CAA anema memorial tulu ka yanglutsü. Iba ya state-i BJP nem osang agütsüba asütsü. Assam nung CAA mebenoktsü" ta Assam Congress President Ripun

Bora-ia metetdaksü.

"Guwahati nung otsütsütsü nüngshilung ka yanglutsü. Congress-i election nung takok anguba sülen CAA anema inyaka indang memorial ka yanglutsü. BJP-i ozüng tamajung yangluba, anema inyaka aser nisungtem apuba nübortemi kodanga mamatsü. Assam-i takok angutsü" ta Assam Minister Rakibul Hussain-ia ashi.

"BJP-i Assamese nunger madak yimsü asüba tatemleni arur. Assam nung Congress-i takok angutsü aser CAA anema nübortemi noktakba indang memorial ka yanglutsü. Joi Axom" ta Assam Legislative Assembly nung CLP leader Debabrata Saikia-i ashi.



Mongulbar nungi Diphu kübok Rong Ketong nung 47 buba Karbi Youth Festival tenzükogo. Iba benjung ya Karbi Cultural Society (KCS) ajanga ayongzüka amonger aser tanü Karbi Anglong Autonomous Council Chief executive member, Tuliram Ronghang-i lapoktsü. (Diphu, February 16)

Meghalaya nung load shedding anener: Conrad Sangma

Shillong, February 16

(Agencies): Meghalaya nung taruba ghonda 24 tsüngda load shedding anentsü ta Meghalaya Chief Minister Conrad Sangma-i metetdaksü.

State nung joko load shedding malitsü ta Meghalaya Energy Corporation Limited (MeECL) Chairman cum Managing Director-ia ashi.

"State sorkar nungi teyari agia aser MeECL nung firm repayment nangzükba ajanga Power Grid-i regulation notice agiener. Meghalaya nung joko load shedding malitsü. Mapang tamajung ajurudang ajaki angateta yaritepba atema kanga pelar" ta MeECL nung CMD-i

ashi.

"Tang nungi state nung load shedding malitsü. CM Conrad Sangma-i MeECL tenüng nung sen agüja yaritepba atema pelar. Nenoki aremazüka ataba atema pelar" ta Meghalaya Power Minister James Sangma-ia metetdaksü.

Deobar nungi Meghalaya nung anogoshia ghonda 7 load shedding süyonga aru.

MeECL-i Power Grid Corporation of India Ltd (PGCIL) nem transmission charges atema Rs 74.65 crore sentsüh agütsütsü lir saka MeECL company nung senotsü khuret aliba ajanga magütsüteter.



Mongulbarnü Arunachal Pradesh nung Wancho Naga nungertemi Oriah benjung amongdang tetsür telok kati tsüngsangba noksa nung angur. Wancho Naga nunger ya Longding district kübok Patkai Hills nung timba lir aser parnok atema Oriah benjung ya kanga tongtipang benjung ka lir. Tanü Arunachal chief minister Pema Khandu-ia Wancho Naga nunger den benjung salem lemsatepogo. (Longding, February 16)

Tripura police constable ka mapa nungi anentsü

Agartala, February 16

(Agencies): Tripura police nung head constable Gayatri Das-i ozüng alema ganja shibelener den yaritepba atema tai tonglokja mapa nungi anentsüogo.

Gayatri Das aser Prashanta Chakraborty na phone nung ganja alitsü, ayoktsü aser bendena ayutsü indang jembiba social media nung prokshiba sülen West Tripura district superintendent of police, Manik Das-i la mapa nungi anentsü.

Phone nung jembiba mapang Chakraborty-i ganja ayokba nung sen anguba, miima ayuba aser jenjang kwii ayokba ajak shia lir. Gayatri Das aser Chakraborty naprong

Mohanpur sub-division nungi lir.

Deobarnü Das-i Chakraborty den 'Ganja' bener arutsü aser tesem ka nung yutsütsü indang jembiba.

Das ya Tripura police headquarter nung mapang talangka mapa lemsüka inyaker aser iba jagi tongtipang nisung aikati la meteta lir, ta police osang ka ajanga metetdaksü.

Police-i Das indang mobile phone dena puogo. Ajisüaka, Chakraborty ya jena ogo aser aputsü bushiteper.

Gayatri Das dena Tripura nung tang tashi nung police 88 tashi ganjalu ayimertem den tesentaktep aliba atema mapa nungi anentsüogo mesüra pua lir.

Karbi telungpur telok PDCK-i ceasefire metetdaksür

Diphu, February 16

(Agencies): Karbi nunger telungpur telok People's Democratic Council of Karbi-Longri (PDCK)-i Bodbar nungi ceasefire alitsü osang metetdaksüogo.

"PDCK-i February 17 nungi prangpong-injang mamshitsü aser yimjung yanglutsü" chairman JK Lijang-i ashi.

Karbi Anglong Autonomous Council (KAAC) CEC Tuliram Ronghang-i terenlok aser tejakleni aotsü atema yimjung bener aruogo, ta Lijang-isa ashi.

"India sorkari ajaki molungtepa telemtetba ka agitsü atema süoki ia telangzüba tajung agütsütsü imlar" ta PDCK

chairman-isa metetdaksü.

PDCK indang Red Army nung commander ajaki February 17, 2021 nü ozüng alema mapa inyaka ajak anentsü ta Lijang-isa ashi.

PDCK ya Assam kübok Karbi Anglong, West Karbi Anglong, Dima Hasao aser Nagaon o Golaghat district kübok tesem kar nung mapa inyaker.

Yaküm November ita Karbi Anglong district nung police-i PDCK indang general secretary apu.

Thekerajan tesem nung police-i Nongme Tungjang (Sanjib Phangcho)-i prangpong bena lia apu.



TIR YIMYIM YIMOBILEM (EDITORIAL)

DIMAPUR RASEMNÜ, TSÜKLAI (FEBRUARY) 17, 2021

KEN O TEMBANGA JEMBIR NA ?

Naga nunger yimten nüchiso bushir teloktem o India government na tsüingda Naga yimten ken o dak sendakba onüktem ajak tembanga jembirgo ta Nagaland angh R.N.Ravii tatar senden nung metetdaksüba osangbo tajung amai saka temangmangtsüka lir. Iba kasa o ya pai taoba mapanga metetdakja aruogo saka Naga yimten tebilemtsübo ano mekoktet tang tashi kangshidagi. Atangji, Ravii dang masü saka 2015 küm August 3 nü India government o NSCN-IM na tsüingda 'framework agreement' renemba sülen India ato kilonser Narendra Modii dena bendanglen jembia jajadang, Naga yimten tebilemtsü tatem küma latetogo ta metetdakja liasü. Atangji, India nunger asoshi dang masü saka Naga nunger asoshia NSCN-IM o India government na tsüingda yimten ken o tatembang küma latettsü asoshi 'framework agreement' latetbaji takok tuluka angu amai bilem, kechiyong yimten ken o tilateri ajak enoksema meliaka, Naga yimten jenjang ya koba tashi ka nung, koma latettsü, iba tasazük longteta yutetbaji takok tuluka liasü. Atangji, aibelen kaji "Framework Agreement" ji parnoki nübortem dang mesayui miima ayu, tetezü nübortem dang sayutsüsa temulungsüa renemba ken o kabo masü asü südi. Aji oda, tesülenang angazükba agi, Framework agreement nungji India government o NSCN-IM na tsüingda tangatetep ken o lenjem kati arua latetbaji, NSCN-IM teloki Naga yimten ken o ya India telongjem kübok saka jenjang balaka nung alitsüsa latettsü agizüktetba ajanga liasü. Iba denji ano Naga nunger li ajak yimten ka kübok longjema meyutetaka, Naga nunger alidak ajak nung tang Nagaland nung alir Naga nunger asoshi linük temzüng arla 371 A ajanga agüja aliba temetentem ya agütsütsü terenemba liasü ta angazüker. Atangji, India government o NSCN-IM na tsüingda August 3, 2015 nung lemtetba framework agreement nungji Naga nunger temzüng aser wako balaka alitsü indangbo shia malitsü, tanü iba jagi parnok tsüingda telemtetba kati marutetter. Ano, külen tanünga Naga yimten nüchiso bushir teloktem longjemer akümba NNPGs (Naga National Political Groups) o India government nabo India temzüng küboksa saka ano Nagaland jenjang tajungba ka nung alitsü ken o renema dang yua lir. Ajisüaka, NSCN-IM telok den tangatetep telemtetba kati marutetba ajanga India government-i NNPGs den telemtetba ken o tatembang küma majenbangi atar. Ajia kanga shitak, kechiyong Naga nungerji kin ka dang, anungji yimten telemtetbaa ka dang asütsüla. Ajisüaka, telok ka onsara tekong merangba ajanga haihaura akar teloktem mezüngshir amai ka kümadakra, iba jagi ano tebilemtsüang tali adoktsü. Naga nunger yimten tebilemtsü latettsüba ya temela masü, kechiyong Naga kin kübok ano kin balala aika lir aser kin shia oshi balala aser state-a balala nung alir. Iba denji ano linük tenzüker paikaya, shiba den jembir shiba den mejembitsü ? Iba ama tensa tia ka nung Nagaland angh aser India tenüng nung Naga nungertem den jembir R.N.Ravii Naga yimten tebilemtsü ken o tembanga jembirgo ta ashir saka ano külen oagi India tatar senden nung jembidangbo, India government tenüng nung jembir, tataribo Naga yimten ken o tatembangleni arua jembidagi ta ashir ta India tsütsüa government-bo ka dang saka ken o balala jembir. Ibaji Naga nunger asoshi tajungtazü osang kabo masü. Atangji, yimten telemtetbabo magitetter saka ken o ajak tembanga jembirgo ta tejembiri ashiba nungji tangatettsü tuluka lir. Tetezü, tang India temzüng aser iba telongjem kübok aliba Naga nunger ajak tang amai India temzüng kübok alitsü, anungji Naga nunger asoshi temzüng balaka menügdaktsü aser temzüng balaka melira Naga nunger yimten wako balaka menügdaktsü, ajisüaka Naga nunger Nagaland nung alirtem dang masü saka Manipur, Arunachal Pradesh aser Assam nung alir Naga nunger ajak nem Nagaland nung alir Naga nunger nem agütsüba temeten aser tashi ajak agütsütsü aser parnok ajakji tanga state-tem dang nungibo jenjang tajungba balaka nung yutsütsü ta R.N.Ravii bilemer südi. Item onük ajak ya tanga Nagaland tatar senden nung benoka jembidagi saka tejembisangbo tashitsüka shir oadoker asünungji, Naga yimten tebilemtsü ken o kong koda tembangar, aji ashitsü pur mali, Chief ministeri anir government nung alirtem timtemba angur. Iba jagi Chief minister-i kasa onük nung opposition purtemi asüngdangba langzü dang, ibaji kü o masü saka angh-i jembiba o ta dang langzütet. Shitakba agibo aji tai, kechiyong tatar senden nung angh-i jembiba ken o ji pa jurila o masü saka government o, anungji kechi onük südirsüaka tatar senden nung angh-i jembiba o ji government nung alir yimsüsürtemi langzütettsüla. Aji oda, shitakba ken o tembanga jembir süra, R.N.Ravii anir Naga yimten tebilemtsü ken o ya tatem küma telemtetba kati arutettsüla.

OLEMSABANG

KHRISTAN TAMANG, LOKTI YANGLUSHIBA ASER LAIPUTI RATETYIM

~ Dr. Imsenperong

(Yashi adok nungi...)

Khristan tamang, lokti yanglushiba aser Laiputi ratet asem ya sendaktepa lir. Tanü asen lokti nung ochimashi aser teraksa züinba ya tamanger shiai pei tim teinyaktsü meinyakba agi dang masü, Laiputiratet jangja magütsütetba ajanga lir. Laiputiya lokti temenen anema nok-nü lir kechiaser Laishiba nung koba Yisu Khrista ajanga jungkai adok iba ochi o ajemdaker marangshiba agi ochimashi aser teraksa den rarateter.

Tamanger Tamang aser Alima Temelenshi

Lokti taküm kaji teti melenshir. Paul putu mesüra Laiputishir Augustine, Luther, Kiekegaard mapang kenyongi balaka. Asen otsüla-obula mesüra Clark sahab nunger mapang asen putu den medemdangtsü makok. Temelenshi ulura. Yamaji tamang tangatetba kenyongi balala asür. Par mapang LaipTamanger kaji Yisu jiloshir (imitator) ka aser ibajiloshibaji pei mulungjang nung dang masü, saka lokti tentetet ajunga nung takümi sayutettsüla. Yisu sülen anitakba tsüngsüji mapa agi mesayutetra tamanger ta asübaji kecha kuli maka. Rara tongpang nung meraradang nung kodasür tongpang akokba otsü jembitsü aser jembira tiyazü asütsü. Yamaji Khristan kati alima temenen anema meraradang koda sür temenen tongpang akoktsü aser jembitsü. Yisu sülen anitaker ta asübaji temulungjang, kibong, aser tenlaki nung dang masü, lokti aser alima maparen kongsa tamajung lir yangji melenshidaktsütsü asoshi tasü ita ochi nung shilem agiba dangji shidakba Yisu sülen anitaker ka ta shitet.

Ochi Mapa nung Arogo aser Yimden Tebendang Mali

Arogo aser yimden ana ya bendang bendanga tanak aser temesüng ama kodanga meyutet. Kar-i iba lokti tentet ana ya ochi mapa asoshi bendanga amshira / bilemera ajibo tamashi tebilemba asütsü. Tat. agi arogo tenzükerbo ochimashi anema lokti rally mesüra ochimashi anema noktakba (public protest against injustice) nungbo matentsüla ta angatetbajitai. Itemji arogoi anir inyaktsüla. Yimden ya tamanger taküm nung shilem ka. Yimden yanglushiba mesüra yimden-yimli mapa ta asüba ya yimden yimsüsür aser arogo nung sendaka malir mapa dang masü, saka senso (tamanger-a süang, mamanger-a süang) tajung shiamapa lir. Tamangba yimsüa yimden lokti dak sendaka lir. Yisu alimai arubaji (Incarnation) temeshipur (Church) dangi dang aru masü, temenenpur (Yimden) dangi aru. Anungji Yisu alimai aruba nükjidongji temeshipur (Arogo Tenzüker) anitener kotaki anier aotsü aru masü, yimden yanglushiba nung shilem agia lokti nung temelenshi (transformed society) adokdakja ajak tesenüp aser yimchi-yimjung (Kotak) nung alitsü aru ta angatetdi.

Arogoji Yisu Khristai sayuba nung anitakba lokti ka. Aser arogopurji Yisu Khrista dak amanger telok. Khristan kaji taküm ali tashi iba lima nung alitsü (sür külenang kotak nungjibo nai taküm alidang ochi inyaka lira alitsü akok). Tamanger / arogo tenzüker kaji Khristan dang masü, saka yimden-yimli nung senso tajung ka lir aser alima rangpen yanglushiba nung shilem kar. Anungji tamanger ka jagi koda tamangba nung akanga nokdaker, yimden-yimli yanglushiba nung shilem agir ibaji tongbang ta angatettsüla. Tamanger kati yimden nung shilem agiba ajanga dang alima yangertet aser yimdenji tamangba sayu o ajanga dang ochi mapa inyaktet. Tetsü-teboui jembia aruba ama noki nok mejirar saka nokji longzük nung dang chirar aser nok chirabaji nokjim nungji dang meteter. Yamaji arogo aser yimden tesendaktep kar.

Arogo nungerji yimsü amangba jagi senso ka tim-nguyim (rights and privileges) samar ta mangatettsüla. Tamanger kaji yimsü keta-asener ka aser senso tajung ka lir. Tetezü tamanger kaji arogo nung tenzüka agi yimden nung alar ka ama pei tebilemba, pei tejembinüba aser pei teinyaknüba meinyakteti kümdaktsür ta mangatettsüla. Ochi o jembitsü shingaia nokdangtsü makok. Anungji tamanger kaji shia lokti yanglushiba nung teinyaktsü shilem kar aser aji Laishibai dang masü, alima ozüngia metenja lir.

Kodang loktiliba mesüra lokti (public) ta südir, ya jurila telok ka masü, saka ibai meimchir lokti taküm libaliruba ka aser yangji nisung ajak densema aser sendaka lir. Lokti ka nung yimden yimsüsüba-asüang, anema alitsü maparena süang, rongsen ketzüng-a süang, lenmang aser tzü terenlok atema-a süang, tesangwa (electricity) atema-a süang item ajakji tongtibang aser item ajak ochishia anebalutsübjinungji ya arogo nunger mapa aser ya yimden mapa ta melemsai nisung ajak khuret aser tebilemtsü lir. Yangibo tamanger matentsüla mesüra Laishibai memelar ta masü saka nübur ajak teinyaktsü tim lir. Lokti mapa ya yimden yimsüsür aser nungtuko nisung asoshi dang masü, sakanübur ajak mapa lir kechiaser nisung ka takümüji lokti taküm lir. Nisung kari dang lokti mapa aser lokti teraksa yanglutsü ta masü, nübur songjen khuret lir.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Syria nung tongti putiri Khristantem linüki meyipa arutsü mepishir



Syria arrtsülen Khristan refugee tem noksa nung angur.

February 16, 2021: Syriac Catholic Archbishop of Damsucs-i Syria nung Catholic Khristantem aser refugees dang kidangi meyipa shilangtsüla, ta mepishiogo.

Tongti putir, Battah-i, linük tanaben asentenshia yangershiba nung Khristantemi tongtibang shilem agitsüla aser tamangba yimsü balala ajak longjema alitsü atema ajungshitsüla, ta ashi.

Syria nung rara tenzükba sülen tersa (küm 10) jungnüa arur; iba mapang nung nisung million 6.7 dak temai linük toktür jenogo.

Tang Syria nung million 3.6 shi Turkey linük nung jenoka lir aser tanüngbaji Middle East linük balala nung jenoka lir.

Turkey-i pusemba terlok balalai Assyria nung jila Tel Tamr nung Syriac Military Council den raradar. 2019 küm October ita nung Syrian National Army-i northeast region amakba sülen nungi rara adoka liasü.

India nung Saraswati külemtsü tuyuba Khristantemi ashishir

February 16, 2021: India linük nung Khristantem anema inyakba mita reprangba meimchir temeden telok kati Daman & Diu administration-i Hindu nung Saraswati akhümtsübutsi atema tetuyuba agütsüba ashishir.

New Delhi nung amenoka aliba United Christian Forum (UFC) teloki Daman administration aser Directorate of Education of Daman dang tangsa iba tetuyubaji agientsüla, ta takhangba agütsü.

February 11, 2021 nü Daman Administration-i sorkar school ajak, sorkari yariba school ajak aser nija school tem nung sarasadem agitsü aser Hindu nung Tsüngrem Saraswati nem akhüm agütsütsüla, aser school tem nung iba sentong agiba noksa den report February 17 tashi nung agütsütsüla, ta tuyua liasü.

"Saraswati Tsüngrem asoba anogomong nung Vasant Panchami amonger, iba tsüngrem ya shisatsü, temeshi aser ochi temaitsü tsüngrem lir," ta tetuyuba nung shia lir.

Dadra & Nagar Haveli aser Daman & Diu nung school principals aser shisaliok reju ajak nung tekolakpurtem dang February 16 nü Vasant Panchami anogomong nung school tem nung sentong ayongzüka agitsüla, ta ketdangsertemi tuyua liasü.

Ibaji ashishia February 15, 2021 nü UCF Convenor, A.C Michael-i sangdong ka ajanga, "Iba tetuyubaji freedom of religion temeden anema lir aser linük temzüng nung minorities nem agüja aliba temeden anema lir," ta metetdaksü.

"2019 küm nunga Daman & Diu administration aser Dadra & Nagar Haveli administration-i Good Friday sodi magütsütsü meranga liasü. Ajisüaka Khristantemi Bombay High Court nung temepishiba ken o benokba ajanga ketdangsertem tetuyuba thinenja liasü," ta paisa metetdaksü.

"SR Bommai aser Union of India na tsüngda ken o nunga Supreme Court-i tamangba yimsü tsütsü taremzüktep alitsü aser tamangba yimsü ajak kasa akhümtsübutsi, iba denji külemi taküm aser kioijen ajak kümzüka ayutsü, aser tekülem kitem ajak kümzüka ayutsü atema oshidang agüja liasü; item temedentemji linük temzüng nung shia lir, aser secular linük nung tongtibang shilem ka lir," ta pai metetdaksü.

UCF-isa, linük nüchiso atema raradang India nung Khristantemi tongtibang shilem agiogo, nüchiso anguba sülen-a linük yangerba nung Khristantemi tongtibang shilem ka agiogo; Khristantemi armed forces, health care aser shisaliok yangerba nung tongtibang shilem agiogo, ta metetdaksü.

UCF ya Khristan denomination balala ajak adenba Khristan organization ka lir, aser iba telok yagi India linük nung Khristantem anema inyakba aser meimchir temeden anema inyakba mapatem anema ola adoker.

UCF indang 2020 half-yearly report nung shia aliba agi, India nung Khristntem anema inyakba kanga bulua kümдар. 2014 küm India nung Khristantem anema inyakba tatalokba 150 den tajemba liasü saka 2015 küm nungbo tatalokba 200 jungnüa aküm, 2016 küm 200 dak tema aküm, 2017 küm 250 dak tema aküm, 2018 küm 300 dak tema aküm aser 2019 küm nungbo Khristantem anema inyakba tatalokba 328 liasü.

India nung Khristantem anema bulua inyakba state tem rongnung Andhra Pradesh, Bihar, Chhattisgarh, Goa, Haryana, Himachal Pradesh, Jharkhand, Karnataka, Madhya Pradesh, Maharashtra, Odisha, Punjab, Tamil Nadu, Telangana aser Uttar Pradesh state tem lir.

Hindu nung benjung-Vasant Panchami ya northern India nung kanga bulua amonger; Hindu nung atema iba benjung nüngja aika lir, item rongnung Basant Panchami, Saraswati Puja, Shree Panchami aser Sufi Basant densema lir.

Dadra & Nagar Haveli aser Daman & Diu na senteper nütsüng lakh 6 shi lir, ajisüaka Khristan nütsüngbo 9,000 shi dang lir.

ANOGO ABEN TSÜNGREM DEN

LENISÜBA TANELA (YOHAN 14:14-26)

"Ochi Tanelai nenok ajak ochiba dangi anitsü." Yohan 16:13

Tanabuba tangatetba tanelaji, Tanela Temeshi Kibuba Yisui Tanela Temeshiji asenok Teyarir aser Lenir ta metetdaksü. Pai asenok ochiba dangi anitsü. (Yn. 16:13).

Tanela Temeshiji tamanger shia dak alir aser tzüra temdaksür. Kodang tesayuba Tsüngrem nungi mesülir idakji jangratem aser tipdem ka malitsü. Iba indang tenyar Yohani tejangja ashi. "Shirnoki nenok mashileni anisar, parnok indang ni item o nenok dangi züluogo. Pa nungi nenoki kechi mezüja shimtetba angu, aji nenok dak alinung, kari nenok dang sayutsü, aji nenok tenüngdaksü maka. Saka Pai mezüja shimtetba jagi kechisarena indang nenok dang sayu nung, aser aji ochi asünung, tiyazü masü, aser aji agi nenok dang koda sayu, aji oda nenok dak liang" (1 Yn. 2:26,27). Iba osang yagi arogo nung tamangertem aintsü sayuba indang mashir (Ef. 4:11-13). Saka arogo nung tiyazü tesayurtem, shirnoki na ashiochtsütsü meranger parnok indang jembir.

Tanela Temeshi asenok nem tiyazü tesayuba anema tekümdangtsü agütsür (1 Tim. 4:1). Tamanger kari tiyazü tesayuba kar mesüra jungkai adokba kar Khristan telok nung amshitsü merangdir pai Tanela Temeshi jashidaksüra! Pai "tatok makaba temenen" menar! Iba yagi Lucifer nem masadangtetba maongka agütsür. Tanela Temeshiji ochi tanela, anungji tiyazü tesayuba agi pa peladaksütsü makok.

Pauli 1 Tesalonikia 5:19-22 nung Tanela remsepdaksüba mapa asem sayur.

- 1) Sayutsüngiba mezüngmeshi masütsü
- 2) Ajak tendanger tajungba ametang
- 3) Tamajung kechisarena nung pilaa liang. Tesalonika arogo nung Grik nung sungyanglu külemba yimya tesayuba kar lir ta Pauli putet (Tesa. 3:5). Junga mangateti sayutsüngiba ajanga Asentenshi sayutsüngidang sayutsüngiri mezüngbuba onük nungji aibelener. Metendangi agizükba aser tamajung nungi pilaa maliba jagi ajemaluba Tsüngrem Tanela tali jashidaksüra, aser asenok dak aliba Tanelaji remsemdaksür, tangar tanelatem ajak sakdaksür. Tanela Temeshi-i ola matoki tangar tanelatem inyakba ajia dangbo malitsü. Pa tenük meyiba Tanela lir!

Tanela Temeshi arung, kechiaser Na ajanga ainkartemi zülu aser jembir, ochiji lapokang, Na sapi lir, Temeshi Kaketi lapokang! (Charles Wesley, 1707-1788).

Pakistan nung Khristan Evangelist ana nem tai tonglochtsü

Washington D.C, February 16 (Agencies): Pakistan nung Khristan Evangelist anati tsüngrem mezüngmeshiogo ta tai tonglochtsüogo; Tsüngrem mezüngmeshiba ken o nung Khristan Evangelist anaji aitsüra tena nem tasüba temerenshi obendang agütsütsüa akok, ta International Christian Concern (ICC) osang ajanga metetdaksü.

Khristan sayutsüngir ana jagi Lahore yimti nung sayutsüngiba mapang nung Islam yimsü aser Muslim nung Quran temeshi kaketi anema jembio, aser ibaji ajanga Muslim nung mulung yirutsüogo, ta tena nem tai tonglochtsü.

February 13, 2021 nü Khristan sayutsüngir ana-Haroon Ayub Masih aser Salamat Mansha Masih nati Lahore nung aliba Model Town Park nung sayutsüngia liasü. Sayutsüngiba mapang nungji tenati Muslim nung Haroon Ahmad den par medemer aika ajurua liasü.

FIR nung shia aliba agi, Khristan ana jagi Ahmad nem Khristan kaketi "Water of Life" agütsüba sülen ainkartem aser Yisu Khrista indang lemsatepa liasü. Ahmad den jembiba mapang nung mangatettep adokba sülen Ahmad-i, Khristan ana jagi Islam yimsü anema jembio, ta aitsü.

Police-i Khristan ana anema Pakistan's Penal Code kübo Arrla balala nung ajemdaker ken o benokogo. Tena aitsüra tena nem tasüba temerenshi agütsütsüa akok.

Pakistan linüki 1987 küm tsüngrem mezüngmeshiba ozüng benok. Iba sülen item ozüng nung Arrla 295-B aser 295-C bendenloksemba mapang nungi tenzüka Khristantem densema minorities anema tai tonglochtsüba kanga bulua kümogo.


1987 nungi 2017 küm tashi nung item ozüng nung ajemdaker Pakistan nung nisung 1,534 anema ken o benoka liasü. Ken o 1,534 nungjagi ken o 829 (shilem 54) bo minorities anema lir.

Pakistan nung Khristan nütsüng shilem 1.6 dang lir, ajisüaka item ken o rongnung ken o 238 bo Khristantem anema liasü.

Tang Pakistan nung tsüngrem mezüngmeshiba ken o nung Khristan 24 tepuokdak lir.

ICC Regional Manager, William Stark-i, "International Christian Concern-i Haroon Ayub Masih aser Salamat Mansha Masih na atema tebilemstü katsür. Tsüngrem mezüngmeshiba ken o nung Khristantem anema tai tonglochtsüba kija nung ajemdaker Pakistan nung loktii Khristantem anema inyaksü atema ajungshitsü," ta metetdaksü.

"Haroon aser Salamat na anema tai tonglochtsübaji jungjunga bushisüngdangtsü onoki akhanger," ta paisa mepishia metetdaksü.

OLONG PAITEP # 5727**TIPIEN**

1. Chiyungtsü oksa - (5)
3. Tatalokbatem - (5)
5. Tama - (6)
6. Pei meyong aküm - (3)
7. _ _ _ bang - (4)
8. Kinungpurtem - (7)
9. Nokdak masü - (4)
12. _ _ _ la - (3)
13. Ochi masü - (6)
14. Yagi Sü ataker - (5)
15. Temadok - (5)

LANGTSÜNGLEN

1. An tetsü - (5)
2. Juzüa senzüba shiruru - (7)
3. Tamendakdak - (4)
4. Tiak-asang - (6)
7. Tasa - (7)
8. Süngjang telung nung aliba - (6)
10. Ibai masü - (5)
11. Ano mamen - (4)

OLONG PAITEP # 5726 TELANGZÜBA**TIPIEN :**

1. Semtu, 3. Lepko, 5. Bilem, 8. Ulu,
10. Tsünpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong, 6. Lungkak,
7. Milak, 9. Zünga, 10. Temopu,
12. Walu, 14. Ali.

**MR ALOK ASER ENGINEER-4****Yashi adok nungi...)**

- Engineerba** - Saka Alok na? Shitak inyak amai saka nai procedure meshitak inyaknung na bill kodanga mangutsü!!
- Alok** - Engineerba na? Ni Alokba ako di?!! Ku bill ji hapta ka nungsa kü nem magutsura na aser nür kibong lendong onsara tulu nung lir ta metetang!! Aser idangji nai ni tekülemshi ma no? ta na kanga meimba agi nenshir.
- Engineerba** - Alok kidangi tangsa dang ken arung?
- Alok** - Engineerba kechi asü?
- Engineerba** - Alokba kecha masü ako, saka na? nü bill to tanü passed süa ni cheque bentsür adoka na ajarba adi aser na ano ni nü nem work order ana agütsür...saka na? Alok ni atema mapa ka inyakang naibo akoktsü ako...kechiaser na kela Tsüngrem amai nung koda!!
- Alok** - Engineerba ajia kechi aji!!?
- Engineerba** - Alok ana senshiba tu tetsü aser tanur kidangi marur aja!! Ni kanga shisabulura ya!!!
- Alok** - Engineerba don't worry!! Gonta ka majung dang ki adongjar!!!
- Engineerba** - Oh Alok nasa Alokba aja!!!

Lilir.: MSJ

TANÜBO NAI LANGZÜANG

Q. Koba küm Anganwadi tenzük?

A.1975

B.1976

C.1977

D.1978

===== (Taruba adok nung onoki langzütsü)

YASHI ADOK TELANGZÜBA : . Oct 2021



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela
Tasoba Anogo



1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?**FEBRUARY 17 NÜ ATALOKBA TONGTIBANG KAR:**

- 1370 - "Battle at Rudau" - Germany-i Lithuania akok.
- 1598 - Boris Godunov ya Russia indang Tsar ama shim.
- 1670 - France aser Bavaria na military assistance treaty sign asü.
- 1867 - Gyula Andressy ya Hungary indang premier aküm.
- 1882 - Sydney Cricket Ground nung 1buba Test Cricket asaya.
- 1932 - NYC nung Irving Berlin indang musical "Face the Music" sayu.
- 1933 - America indang mezüng osang kaket - "Newsweek" adok.
- 1936 - NYC nung S. N. Behrman indang jilushi "End of Summer" sayu.
- 1946 - Amsterdam nung Humanistic Covenant tenzük.
- 1949 - Chaim Weitzman ya Israel indang mezügbuba Tir shim.
- 1959 - 1buba weather satellite - Vanguard 2 khaketa yok. Iba satellite touzük seret 9.8 liasü.
- 1967 - Beatles-i "Penny Lane" & "Strawberry Fields" ken saya.
- 1969 - Bob Dylan aser Johnny Cash nati kensep ka record asü. Ajisüaka, iba kensep kodanga masaya.
- 1970 - NYC nung Robert Marasco indang "Child's Play" sayu.
- 1972 - European Common Market nung adentsü atema British Parliament i vote agütsü.
- 1984 - 34th Berlin International Film Festival: "Love Streams"-i Golden Bear takok angu.

SUDOKU # 5769

3	9					4	6
			9	3	7	2	8
	7			6			5
	1	3		2		8	6
2				9	3	1	7
				1	8	4	2
8						2	1
	3			5		7	4
5		4	1	7		9	8

TELANGZUBA # 5768

4	7	9	6	3	8	2	5	1
5	2	3	9	7	1	6	8	4
8	6	1	4	5	2	3	7	9
1	3	8	5	9	7	4	6	2
6	9	5	1	2	4	8	3	7
7	4	2	3	8	6	1	9	5
3	1	4	7	6	5	9	2	8
9	8	7	2	4	3	5	1	6
2	5	6	8	1	9	7	4	3

OJANG LUTEP # 5315

- MDYIEN :
- ZÜKTENBA :
- PANMAG :
- CHKEI :
- OMKA :
- IAENMELSH :
- TSAOÜ :
- INGAISHA :
- TTSSHITEÜ :
- KOMAK :

OJANG LUTEP TELANGZÜBA # 5314

NÜKJIDONG AKARIBO TAKÜM NUNG MOKOKMIN AJURUAKA
ALIZÜNG TONGTETSÜSA RANGLOKER ASEMER

TAN HOPTA ATEMA - KOMA SÜLA ?

Q. 1963 küm 1st December sülen Nagaland nung arua alirtem nem Nagaland nung dokan amentsü, taxi aser auto rickshaw anishitsü permit magütsü nunga koma süla?

Olong 20 shi nung February 19, 2021 tashi nung iba telangzüba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.



Defence Minister Rajnath Singh den CDS Gen Bipin Rawat aser Defence Secretary Ajay Kumar nung e-Chhawani portal aser mobile app amenokba sentong nung tangokba noksa nung angur. Iba app ajanga New Delhi nung 62 Cantonment Boards nung alirtem nem online civic services agütsüsü.

PM Modi-i COP26 tir den ajurutepe sensak asem

New Delhi, Tsüklai/February 16 (Agencies): Ato Kilonser Narendra Modi-i Mongolbarnü 26buba United Nations Climate Change Conference (COP26) tir Alok Sharma den ajurutepe climate change onük nung India-UK tesendaktep aser taruba COP26 indang sensaksema liasü.

"PM @narendramodi-i, COP26 tir @AlokSharma_RDG den tanü ajurutepego. Climate change onük nung India-UK tesendaktep aser taruba COP26 indang onük benoka sensaksemogo. PM @narendramodi-i UK nung climate summit takok ngua ayongzüka mongtettsü imlaja ataba lemsatep," ta Ministry of External Affairs (MEA) otongdar Anurag Srivastava-i tweet asü.

Mongolbarnüsa Union Minister of Environment, Forest

and Climate Change, Prakash Javadekar-i Alok Sharma den ajurutepe, taküm Glasgow nung sensaksemtsü aliba tongtibang onüktem benoka jembishinüogo.

"Ni India-i, renewables, disaster-resilient infrastructure, adaptation, electrical bus, metro atsülangshiba, emission intensity tajemba kümdaktsüba aser süngtonglitong tali atemba inyakyim dak sendakba nung jenjang balala agiba indang metetdaksü. Senden kanga tajangzük kaa menogo," ta Javadekar-i ashi.

"Glasgow nung COP26 ayongzüka amungtsü. Pa (Alok Sharma) lenir balala den ajurutepe landing zones dak sendakba nung sensaksemdar. Glasgow nung sensaksemtsü aliba onük tontibangtem ajak benoka sensaksemogo," ta minister-i shisem.

Javadekar den ajurutepeba

sülen Alok Sharma-i Twitter ajanga, "medemer Prakash Javadekar den Paryavaran Bhawan ajurutepeba atema pelar. NetZero architecture A indang tatishitsü aketba India indang Paryavaran Bhawan nung COP26 dak sendakba nung sensaksemogo," ta ashi.

India semdangba mapang Sharma-i minister tejen aser shishilembaba aser lokti tentet balala nungi lenirtem den ajurutepe, UK-India climate partnership akangshitsü aser COP26 summit takok nung mungtettsü atema sensaksemogo, ta New Delhi nung British High Commission sangdong ka ajanga metetdaksü.

COP tir ama Sharma-i tang mezüngbuba Asia semdang, kong pai India nung tüzümpung dak sendakba nung terenlok indang benoka sensak asemtsü imlar.

Tapovan tunnel nungi agitetba tasü mang 11 prongla maitsü jangjaogo

Chamoli, Tsüklai/February 16 (Agencies): Tapovan tunnel nungi agitetba tasü mang 11prongla maitsü jangjaogo, ta Deputy Inspector General of State Disaster Response Fund (SDRF) Ridhim Aggarwal-i Mongolbarnü metetadaksü.

"Tasü mang 58 nungi 31 maitsübo jangjaogo. Tapovan tunnel nungi agitetba tasü mang 11 prongla maitsü jangjaogo," ta Aggarwal-i ANI dang ashi.

"SDRF aser NDRF team tem den azü squad densema tang Raini yimtsüng aser temeket nung maneni bushitsüngdangdar," ta lai ashi.

Uttarakhand Police-i ashiba agi, Chamoli nung rürjep anenzüka aluba lendong nung asür 58 jungogo aser Tapovan

tunnel nungi tasü mang 11 agitetogo. Ajisüaka ano tang tashi nisung 146 mongui lir.

Kasa mapang nung Chamoli District Magistrate Swati Bhadoria-i, Chamoli nung tang teküzmükba maparen balala inyaka aliba asadangogo.

Iba sülen Bhadoria-i, asür kinungertem aser nisung samara bushia aliba kinungertem den ajurutepe liasü.

Uttarakhand Irrigation Minister Satpal Maharaj-i taoba mapang ashiba agi, state sorkari Chamoli nung rürjep anenzüka aluba ajanga lendong bener arutsüba asadangtsü aser satellite ajanga glacier tem asadanga alitsü asoshi department ka tentettsü.

"Chamoli nung rürjep pokzüka

aluba ya lenla ajak nungi asadangtsüla. Onoki ministry kübok glaciers tem satellite ajanga asadangtsü aser bushitsüngdangtsü atema department ka tentettsü," ta Satpal-i ashi.

"Rürjep yangsaa aoba aser tenem nung tidal wave adokdaksüba ya onoki kanga shisabulua bilemer. China nung senziisenpong asadanga alitsü atema plutonium pack tokja aliba dena bushitsüngdangtsüla," ta pai ashi.

Uttarakhand, Chamoli District kübok Tapovan-Reni tesem nung rürjep poksaba ajanga Dhauliganga aser Alaknanda ayong nung tüzüshi alu aser ki aika raksatsüba den Rishiganga power project dena rakasatsüogo.



Kingsway Camp, New Delhi nung 74buba Raising Day Parade mapang Karol Bagh Police Station nem Police Station tajungtiba marok MoS Home G. Kishan Reddy-i agütsüba noksa nung angur.

India nung Covid-19 national recovery rate 97.32 % jungogo

New Delhi, Tsüklai/February 16 (Agencies): Mongolbarnü India nung Covid-19 national recovery rate 97.32% junga alizüngtasen ka tongtetogo, koba alima nung timtiba rongnung densema lir, ta Ministry of Health and Family Welfare-i metetaktüsü.

India nung maneni tashidak poteter tajemba küma odar aser Mongolbarnü tashi nung tashidak menar temang anepalua alir lakh 1.36 dang kümogo.

Tang temang anepalua alirtem ya India nung tashidak menar shilem 1.25 dang lir.

Tang tashi nung nisung crore 1.06 anepogo. Taoba ghonda 24 tsüngda nisung 11,805 anepogo.

India nung tashidak aneper aser temang anepalua alirtem tetsüngda 1,04,96,153 jungogo.

Kasa mapang nung state aser Union Territories 31 nung national average dang nungi recovery rate timba kümogo. Daman and Diu, aser Dadra and Nagar Haveli nung recovery rate shilem 99.88 jungogo.

State/ Union Territories 17 nung taoba ghonda 24 tsüngda tasüba osang kecha mali. State aser UT tem rongnung Lakshadweep, Sikkim, Himachal Pradesh, Uttarakhand,

Gujarat, Chandigarh, J&K (UT), Meghalaya, Ladakh (UT), Manipur, Haryana, A&N Islands, Rajasthan, Nagaland, Tripura, Arunachal Pradesh, Daman and Diu aser Dadra and Nagar Haveli densema lir.

Maneni Sikkim, Meghalaya, A&N Islands, Nagaland, Tripura, aser Daman and Diu aser Dadra and Nagar Haveli nung taoba ghonda 24 tsüngda nisung ka dak danga tashidak mepotet.

February 16 anepdang 8:00 ako tashi nung linük nung healthcare aser yakbang nung inyaker lakh 87 dak tema nem vaccine agütsüogo.

Osang ajanga ashiba agi session 1,84,303 ajanga beneficiaries 87,20,822 nem vaccine agütsüogo, kong 61,07,120 HCWs (1st dose), 1,60,291 healthcare workers (2nd dose) aser 24,53,411 frontline workers (1st dose) densema lir.

Taoba ghonda 24 tsüngda tashidak agi asür 81 liasü. Asürtem ya state pongu nungi shilem 70.73 lir.

Asürtem rongnung Maharashtra nungi nisung 23, Kerala 13 aser Punjab nungi 10 densema lir.

MP Bus tsükokba lendong nung nisung 40 süogo



Madhya Pradesh, Sidhi district nung bus ka ayongi aiba sülen NDRF team-i teküzmükba maparen balala inyakba noksa nung angur

New Delhi, Tsüklai/February 16 (Agencies): Mongolbar anepdang Madhya Pradesh nung bus ka tsükokba lendong nung asür 40 jungogo aser tang teküzmükba maparen balala inyakdar. Asürtem rongnung tebur 21, tetsür 18 aser tanur ka densema liasü.

Nisung 50 mena aliba bus ka Sidhi nung ayong kati ai. Iba bus ya Sidhi district nungi Satna-i oya aliba mapang Rampur Naikin tesem anasa anepdang 7:30 ako shi nung tsükok. Police temi ashiba agi, iba bus ya Chhuiya Valley leni aotsü liasü saka bus anisang yagi gari tali nongtepba nungi jenbotsü asoshi iba lenmang agi.

Ajisüaka pai bus mazüokteti iba yong yagi agi. Bus anisang yabo kümzükogo.

Bus tsükokba osang angazükba sülen SDRF team ka iba tesemi aritepa ao aser crane amshia bus ayong nungi agitet. Kümdangshia alitsü atema Bansagar tüzünokdang nungi tzi yimzüka aluba den nokdanga ata.

Police-isa ashiba agi, nisung 32 amentsü yangluba bus nung nisung 54 mener liasü. Bus nung mena alir tenetbo teküzmükertemi anitetogo. Teküzmükba maparen tembangba sülen ano asür timba akümtsü akok, ta

teküzmükertemi tsübuja bilemba lemsatepogo.

Kasa mapang nung PM Modi-i, iba lendong atalokba angazüka mang ayimba lemsatepogo aser asür kinungertem nem sen lakh anana agütsüsü nangzükogo.

Chief Minister Shivraj Singh Chouhan-i, transport minister Govind Singh Rajput jaoka iba lendong atalokba asadangogo. Lendong atalokba osang angazükba sülen CM-i, Mongolbarnü pa tinyaktsü maparentem ajak thitsü.

"Kechi atalokogo, iba ya kanga dang tesasatsüka. Teküzmükba maparen balala inyakdar. Minister ana iba tesemi odar. Asür kinungertem nem sen lakh pongungu teyari agütsüsü. Lendong agi meneper alirtem den state ajunga nokdaka lir," ta Chief Minister Shivraj Singh Chouhan video osang ka ajanga lemsatep.

Mongolbarnüsa tanga talokba ka nung Tuticorin nung mini-cargo gari ka mazüokteti lenmang anasa ayong kati aiba sülen tetsür pongu asü aser nisung 30 yirua liasü, ta police temi metetdaksü. Tetsürtem ya mapai oya aliba mapang gari anisang yagi gari mazüokteti Maniyachi nung ayong tilakati aniok.

Myanmar mitkari election tasen agitsü nangzüker



Mandalay, Myanmar nung mitkartemi sorkar atsüngdokba anema longkak aitba mapang nüburtemi pua aliba Myanmar lenir Aung San Suu Kyi indang noksa sayuba yangi angur. February 1 nü mitkar tashi amshia sorkar atsüngdokba aija aser election ajanga shimtetba sorkar tentettsü takhangba agüja nüburtemi ola adokba mapang Myanmar nung security forces temi longkak aiter tsütsü prangbong yur süng agi züka aridoktsü merang.

Nay Pyi Taw, Tsüklai/February 16 (Agencies):

Mitkar tashi amshia sorkar atsüngdokba anema linük tesem ajungalen maneni longkak aitba mapang Myanmar mitkari nangzüker ama election agitsü aser tashi agütsütsü ta nenshia ashi.

Army odongtar Brig Gen Zaw Min Tun-i election nung tim masüba inyakba sülen mitkari amokbang, ta maneni ashi saka kuli kecha magütsü.

Paisa pua alir Aung San Suu Kyi anema ken o tanabuba benokogo, ta ashi.

February 1 nü mitkar tashi amshia sorkar atsüngdokba sülen nüburtemi longkak aityonga arur.

Yimtong nung mitkar timba kümogo aser yimti kar nung injang bomb agi raksatsütsü makokba garitem yoka lir, aser ibaji ajanga longkak aiterem tashiyim agi anentsütsü yimya ajiteter.

Sorkar atsüngdoker mitkartemi osangbener senden mezüngbuba amenba mapang odongtar Zaw Min Tun-i ashiba agi, mitkartemi mapang talangkabo yimsü masütsü aser election agiba nung takok angur nem tashi agütsütsü.

Saka pai election agitsü atema anogo mashi.

Mongulbarnü linük yimtiba, Nay Pyi Taw nung osangbener den jembiba mapang, Suu Kyi anema ken o talila benokogo aser ibai linük indang Natural Disaster Law nung aibelenba dak sendakba lir, ta Zaw Min Tun-i ashi.

Suu Kyi-i ozüng alema bendanglima nungi walkie-talkie tem bener arua amshiba atema tai tonglokja ken o benoka lir.

Suu Kyi ta lar kidang shibanga yua lir aser la ya sadoksayima aser junga lir, ta Zaw Min Tun-i ashi.

Pai iba osangbener senden ya amshia sorkar atsüngdokba anema longkak aitba aser security forces den rara mesüba atema aija liasü.

Police tanishir ka ozüng mali inyaksangshiba nung yiru aser mapang tatsüka lir yiruba zübu nungi asü, ta pai ashi.

Longkak aitertemi security officer tem den rarateba arur aser nüburtem senshidaktsütsü mechi police temi tear gas aser rubber bullet tem amshiba osang lir.

Longkak aiter arishi küm 19 tain May Thwe Thwe Khaing dak tekolak nungi injang agi akhaba sülen la takum lendongbang nung lir.

Longkak aitertemi police dak longru agi aonba azüoktsü

mechi mera kar agiogo, ta Zaw Min Tun-i ashi.

Sorkar atsüngdokba mitkar lenir anema longkak aiterem küm 20 tashi tepuokdak ayutsü, ta Myanmar mitkartemi Hombarnü sangdongba sülen UN-i mitkar lenirtem dang longkak aiter azüoktsü asoshi tashiyim amshira timtem tulu alitsü, ta tekumdangtsü ashi.

Mongulbarnüa longkak aiterem anepbongi adenshi aser Yangon aser Mandalay amala yimtittem nung nüburtem adenshia liasü.

Longkak aiterem train lenmang nung mejanga Yangon aser southern tsütsü Mawlamyine tsüngta train service nokdanga liasü.

Myanmar nung aonung ana tashi internet shibangja liasü, saka Mongulbarnep lapoktsüogo. Sorkar atsüngdokba sülen mitkartemi mapang shia internet shibangja arur.

Honibarnü mitkari parnok nem court nungi temelaba magie nisung apütsü, bushisüngdangtsü aser ghonda 24 dak tema pua ayutsü tashi agütsü aser osangbener dang mitkari sorkar melenba ya tashiyim amshia sorkar atsüngdokba ta mejembitsü ashi.

Bangladesh nung nisung pongu tasüba agi merenshitsü obendang agütsü

Dhaka, Tsüklai/February 16 (Agencies): Küm trok tejakdang religious extremism anema nokdakba U.S. blogger ka tepsetba dak sendakba nung Bangladesh nung okadak kati Islamist militant telok ka nungi züngsem pongu tasüba agi merenshitsü obendang agütsüogo.

Bangladeshi nungi jakzüker U.S. nunger Avijit Roy ya 2015 küm Dhaka book fair ka nungi pa kinungtsü den kidangi meyipa arua aliba nok agi lepset. Pa kinungtsü Rafida Ahmed-a tekolak yiru aser temeyong ka alangtoktsü.

"Parnok anema ken o benoka aliba nung kecha terata mali. Okadak ajanga parnok nem temerenshi tesashitiba agütsüogo," ta public prosecutor Golam Sarwar Khan-i, Dhaka nung Special Anti-Terrorism Tribunal nung obendang agütsüba sülen ashi.

Okadak ajangsa iba ken o nung nisung ka taküm tepeyong tepuokdak ayutsü obendang agütsüogo, ta Khan-i ashi.

Paisa, Mongolbarnü aitsüba nisung trok ya al Qaeda-i ajungmesoba domestic militant group Ansar Ullah Bangla Team nungi liasü. Police temi ashiba

agi, iba telok ya secular activists aser bloggers tem aika tepsetba nung densema lir.

Army major aliba nungi anentsü alisa Syed Ziaul Haq, shiba iba telok lenir asütsü aser pa sentong nung iba nisung tepset asütsü ta amanger, pa aser tanga züngsem ka obendanga agütsüba mapa dena maliasü aser tenata tasüba agi merenshitsü, ta Khan-i ashi.

Item nisung trok tenüng nung okatsür Nazrul Islam-i ashiba agi, parnoki temaba okadak ka nung iba ken o benoktsü.

Muslim nunger timba aliba linük Bangladesh nung 2013 nungi 2016 küm tsüngda bloggers, secular activists aser nütsüng agi ajema aliba tamangba yimsü telok balala züngsemtem aika maka aruogo, koba Islamic State mesera al Qaeda den sendaktepa aliba telok temi nangzüka liasü.

Tatalokbatem rongnung 2016 küm July ita nisung kati Dhaka nung café kati prangbong bener ia nisung 22 tepsetba ya tamajungtiba asütsü. Asürtem timba bendangertem liasü.

Iba tatalokba sülen telungpur asütsü ta temulung melemi bilemba nisung 100 dak tema tepset aser nisung noklang aika apu.

Congo ayong nung rong ka mükepok; nisung aika asü

Kinshasa, Tsüklai/February 16 (Agencies): Democratic Republic of the Congo (DRC) anüolen tsütsü Congo ayong nung rong ka mükepokba sülen nisung tajemba agi 60 asü aser noklang aika samar bushir, ta sorkar ketdangsür kati ashi.

Minister for humanitarian action, Steve Mbikayi-i osangbener dang Hombarnü ashiba agi, Mai-Ndombe province nung aliba Longola Ekoti yimtsüng anasa mükepokba rong nung nisung 700 mena liasü.

"Tang tashinung teyari agütsür aser teküzmüker temi nisung tasüman 60 aser takum alir 300 ngutetogo. Iba rongraksaba sülen ano nisung aika samar bushir," ta Mbikayi-i ashi.

"Whale angu apuba rong nung

khu aser nisung tali amenba ajanga rong ya tsü telungi alu. Aser ano aonung rong junga manitetba ajanga lendong ya ajuru," ta ministeri ashi.

Ali rongsen peria aliba linük nungya rong lendong ya mapang shia ataloker, kechiaser rong nung aiben nisung tali amener aser khu tali abener. Ano rong nung amener timbai life jackets magir.

Taoba ita Lake Kivu nung nisung amenba rong ka tzu telungi aluba sülen tanur ana aser tetsür ka asü.

2020 küm May ita kasa awatsüng nung kazüa senzüba rong ka mükepoka nisung ter asü. 2010 küm July ita linük anüolen Bandundu province kübok rong ka mükepoka nisung 135 dak tema süa liasü.

Germany nung angati rapid coronavirus tests asütsü

Berlin, Tsüklai/February 16 (Agencies): Germany nung March 1 nü nungi tenzüka lisopur ajak angati agi coronavirus tashidak tendangtsü asoshi sentong yangludar, ta health minister-i Mongolbarnü ashi.

Jens Spahn-i, tashidak angati agi tendangtsü atema local test centre aser pharmacie tem asoshi shishilembadak rapid antigen tests teperi lir, ta ashi.

Taoba mapang German media group RedaktionsNetzwerk Deutschland (RND)-i, angati agi tashidak tendangtsü atema national testing strategy atsülangtsü Spahn-i sentong yangludar ta sangdonga liasü. Federal sorkari senotsü intokba khuret ajak abentsü, ta RND-i ashi.

Spahn-isa, regulators-i agizükba sülen kidang tashidak tendangtsütsü inyakner, ta ashi.

"Iba tashidak tendangba yimya ajanga anogoshi inyakym teküzmükba kübok inyaksangshitsü asoshi teyari agütsütsü, talisa school aser daycare centre tem atema tajangzük asütsü," ta Spahn-i Twitter ajanga ashiba den test yanglurtem den health ministry sensaksemdar, ta ashi.

Germany nung hopta tsüngda tashidak menar tajemba kümogo aser Mongolbarnü nisung 3,856 dak dang tashidak potet.

Taoba hopta Germany nung lenirtemi tashidak menatepa aoba tajemba akümba sülen tenokdangba balala agütsür aliba tanem tanemi lapoktsüyonga aotsü mulungtepo.



US Tir Joe Biden aser pa kinungtsü first lady Jill Biden na Andrews Air Force Base, Md nung aliba Camp David nung hopta tatem nungzükerba sülen Andrews Air Force Base-i aruba mapang tangokba noksa nung angur.

Neil Young-i 'Young Shakespeare' kensep sayatsü



Neil Young

New York, Tsüklai/February 16, 2021 (Agencies): Neil Young-i concert film aser live album 'Young Shakespeare' sayatsü tebilemba lir.

Arishi küm 75 tain nüngtugu musician, Neil-i 1971 küm shilem agiba nungi fans dang 'unreleased footage' sayatsü, koba March 26 nü Stratford, Connecticut nung The Shakespeare Theater set nungi ajaki meteta aliba Neil indang recording alitsü.

Kasa küm, German TV nung presentation ka atema iba ya record asü. Tang item recording ya alima dang mezüng sayatsü terenemba lir.

Item analogue tape ajak tajungba küma yanglushiogo aser 'After the Gold Rush' tracks, 'Ohio', 'Cowgirl in the Sand', 'Helpless', 'Down by the River' aser 'Sugar Mountain' den 1972 indang seminal LP 'Harvest' indang acoustic recording dena lir.

Neil Young Archives (NYA) site nung, Neil-i, 'Young Shakespeare' ya Massey Hall

nung süngjema tangokba recording ka lir. Young Shakespeare ya tanga dang nungi alakteta agiba sentong ka lir. Iba Archive nung acoustic performance tajungtiba ka lir aser fans dang iba ya sayatsü yongyar."

Iba live album ya vinyl aser CD aser kasa mapang concert film ya standalone DVD nung sayatsü; aser format ajak Deluxe Box Set Edition nung angutsü.

Kasa mapang, Neil-isa 'Johnny's Island' kensep sayatsü sentong lir.

'Cinnamon Girl' kentensang Neil-i 1982 LP 'Trans' atema kasa session mapang, Hawaii nung Honolulu indang Commercial Recorders studio nung item track record süogo.

Mezüngbo, iba collection dang 'Island In The Sun' nüngja agütsü aser collection nungi ken kar 'Like An Inca', 'Hold On To Your Love', aser 'Little Thing Called Love' tem 'Trans' nung tembang.

Iba record ya Neil Young


Archives ajanga yakta sayatsü.

Iba project dak sendakba nung, Neil-i pa indang website ajanga, "'Johnny's Island' ya kensep ka ama NYA nung sayatsü renema lir. Iba kensep nung, 'Big Pearl,' 'Island In The Sun,' aser 'Love Hotel,' aser taoba mapang angashiba ken densema unreleased tracks aika dena lir. Iba record ya jangratemtsüka lir aser yakta sayatsü," ta lemsatep.

Neil Young indang 'Young Shakespeare' kensep nung track tem:

1. 'Tell Me Why'
2. 'Old Man'
3. 'The Needle and the Damage Done'
4. 'Ohio'
5. 'Dance Dance Dance'
6. 'Cowgirl in the Sand'
7. 'A Man Needs a Maid / Heart Of Gold'
8. 'Journey Through the Past'
9. 'Don't Let It Bring You Down'
10. 'Helpless'
11. 'Down by the River'
12. 'Sugar Mountain'

'Blueback' cast rongnung Eric Bana denogo



Los Angeles, Tsüklai/February 16, 2021 (Agencies): Project tasen ka nung Director Robert Connolly den arishi küm 52 tain actor Eric Bana longjemtsü. Iba 'family-friendly' drama nüngja Blueback alitsü. Drama film 'The Dry' nung Eric aser Robert na longjemer inyakba ajaki jangjaa lir.

Mia Wasikowska aser Radha Mitchell den Ariel Donoghue aser Ilsa Fogg naprongla iba project atema

aniokogo.

Connolly-i küm 20 dak tema iba project atema maparen achayanga arudar aser actor-director Robert Woods nem iba project direct südaktsütsü asadangteter.

Arishi küm 53 tain film yanglur Connolly-i kaket zülur Tim Winton indang novel - Blueback nung ajemdaker film atema script zülutsüogo aser Australia - Bremer Bay aser Ningaloo Reef tesem ana nung film tangok tenzüksü

terenemba lir.

Iba project dak alaka, Eric aser Robert nati British nung motorcycle anir mongin, asür Mike Hailwood indang film yanglutsü asoshi asalentong yangludar.

Iba film nung Bana-i Hailwood shilem agitsü renema lir aser Connolly den pai iba film otsü zülua aser direct asütsü.

Bana aser Robert na indang project ya, Hailwood küm 11 tashi motorcycle asayamung nung shilem magi aruba sülen, 1978 küm Grand Prix nung tanaben pai shilem agiba indang otsü ka alitsü. Iba film ajanga Hailwood-i 'Isle of Man TT (Tourist Trophy)' race nung shilem agiba sayatsü. Alima nung Racing asayamung rongnung, Isle of Man TT ya tetsübu/lendong aketba race ka ama züngshir.

"Mike indang otsü nung ajemdaker Eric Bana aser Robert Connolly nati feature film yanglutsü ta osang angashia pelar," ta Hailwood kinungtsü Pauline aser jabaso David Hailwood nati ashi.

MULUNG NEN O



Aso: 13.01.1930 ~ Asü: 08.02.2021

Onoki teti dang amadoktsü makokba ochishir, ajemalu Obala asür **Aolemba Ozükum** (Waromung) asüba mapang kija, kibong aser lokti balala kwi kati nübu, rongsen aser sarasadem ajanga molungsoa yaritepogo nenok ajak dang kinüngerikangasa pelaba iba osang kaket ajanga lemsateper. Takar Tsüngremi nenok ajak moajangma.

- Temeim kinüngtsü, chirnurtem, semchisemnurtem aser kinüngertem

Motorola-i Moto G30 aser G10 saya

LAUNCHED

Moto G30

6.5" HD+ 90Hz display

Snapdragon 662 Processor

64MP Quad rear cameras

5,000mAh Battery (20W fast-charging)

Moto G10

6.5" HD+ display

Snapdragon 460 Processor

48MP Quad rear cameras

5,000mAh Battery (10W charging)

New Delhi, Tsüklai/February 16, 2021 (Agencies): Motorola-i parnok indang budget Moto G-series nung Moto G30 aser Moto G10 smartphone ana bendenlokba sangdongogo.

Smartphone anaprongla nung quad rear camera aser tzi o auyi nungi teküzmüksü angutsü atema IP52 rating inoka yanglutsüogo. Iba den bendenloksema, Motorola Moto G30 aser Moto G10 ya sentsü tapu ana nung angutsü.

Moto G10 aser G30 nung Qualcomm Snapdragon mobile processors den 128GB storage inokja lir. Tang, smartphone anaprongla ya teshimtet market tem ajanga angutsü aser Lenovo meyong Motorola-i tanga shishilembadak iba smartphone ayoktsü asoshi osang tejangja magütsü.

Moto G30 jenjang EUR 180 (Sen 15,900) aser smartphone ya Pastel Sky den Phantom Black colour option nung angutsü. Ano külen, Moto G10 jenjang EUR 150 (Sen 13,300) alitsü aser device ya Aurora Grey aser Iridescent Pearl sentsü nung yanglua lir.

February ita tatemlen, smartphone anaprongla ya Europe shishilembadak ayoktsü. Ajisüaka, international shishilembadak iba smartphone ayoktsü dak sendakba nung Motorola-i ano osang magütsü.

January tetenzüklen, Motorola-i Moto G Stylus (2021), Moto G Power (2021) aser Moto G Play (2021) line-up tem sangdongogo.

Moto G10 nung 6.5-inch HD+ display den 60Hz refresh

rate aser Snapdragon 460 SoC inoka yanglutsüogo. Smartphone nung 4GB RAM aser 128GB onboard storage dena lir, koba memory ulua aginürtemi microSD card ka ajanga atsülanga amshitetsü.

Phone tesülen, quad camera setup ka angutsü, kong 48-megapixel primary camera, 8-megapixel ultra-wide-angle camera den macro shots aser depth sensing atema 2-megapixel camera inokja lir. Selfie tangoktsü atema, smartphone tejaklen 8-megapixel shooter ka angutsü aser iba camera yagi HDR, panorama, aser full-HD recording - 30fps support asür. Tanga feature tsütsü reprangdangra, Moto G10 nung 4G, Wi-Fi, Bluetooth 5.0, NFC, GPS, 3.5mm headphone jack aser 5,000mAh battery angutsü.

Moto G30 nunga 6.5-inch HD+ den 90Hz refresh rate dena lir. Iba smartphone nung Snapdragon 662 SoC den 6GB RAM aser 128GB onboard storage inoktsüogo. Camera atema, handset tesülen quad camera setup angutsü, kong 64-megapixel primary camera alitsü, saka tanünga camera specs tem Moto G10 ama alitsü. Selfie atema smartphone tejaklen 13-megapixel selfie shooter angutsü. Tanga feature tsütsü reprangdangra, Moto G30 nung 4G, Wi-Fi, Bluetooth 5.0, NFC, GPS, aser 3.5mm headphone jack angutsü. Moto G30 nung 5,000mAh battery ka inokja lir aser USB Type-C port teyari ajanga 20W charging support asür.

Titans Club-i 5 buba Master Shield Trophy benogo



5th Master Shield Trophy 2021 champion team Titans Club

pur senpet agizüker külen tangokba noksa nung angur.

Mokokchung, FEB 16 (TYO): Mokokchung District T20 Cricket Federation (MDT20CF)-i Feb 8 nungi tenzüka yangi Imkongmeren Sports Complex Mokokchung nung ayongzükba 5 buba Master Shield Trophy taküm Titans Club-i champion benogo. Feb 16 nü tesüsuba (final)

asaya Titans Club o yaküm champion Trebuchet na asayaba Titans-i run 64 agi Trebuchet madak takok tulu angu. Mezüing jenjang angur nem senpet jung (shiled) den kuli kakat aser sen 40,000/- aser tanabuba jenjang angur nem kuli kakat den sen 20,000/- senpettsüogo.

Nija senpet parnok yagi agizük; best wicket keeper – Mhachan Patton (Redback CC), best bowler – Babudeka (Trebuchet), Best Batsman – Daniel (Skylark), promising player – Imtinuksung (Sovran), man of the match final – Nehal (Titans, 62 runs in 39 balls not out), man of the series – Nehal (Titans) aser best discipline team – United XI Mongchen-i agizük. Taküm iba asayamung nung telok 10-i shilem agi.

Quarterfinal nungi tenzüka man of the match shima parnok ajak nem senpet kuli kakat den sen agütsü. Iba asayamung takok ngua ayongtetsüsa teyariteper aser senpet sponsor asür aser match patron aser shilem agir ajak dang MDT20CF lenirtemi pelaba lemsatepa liasü. Asayamung tembangba sentong nung RTO Mokokchung nung M.V.O., Purnungsang Lkr Chief Match Patron liasü.

Australian Open: Osaka aser Serena semi-final asayatsü



Osaka

Serena

Melbourne, Tsüklai/February 16, 2021 (Agencies): Mongolbarnü, Australian Open tetsür kija quarter final asaya nung, World no. 3 Naomi Osaka-i set ana tashi atonga takok ngua Hsieh Su-wei tsükdaktsü. Rod Laver Arena nung terepranger medeni Asia tsür ana tsüingda quarter tetoktepba nung, asemben tashi Grand Slam asayamung takok angula Japan tsür Osaka-i Taiwan tsür aser world no 71 Hsieh madak 6-2, 6-2 agi takok angu.

"Ni kanga süngjema asayaogo. Tanü ni temulung süa asayatetba atema palar," ta 'winner' 24 angula Osaka-i ashi.

Minute 66 nung Osaka-i arishi küm 35 tain Hsieh tsükdaktsü.

Honibarnü final tongtettsü atema, arishi küm 23 tain Osaka-i 23 ben tashi Grand Slam takok angula Serena Williams den asayatsü.

"Ni kodanga kü indang draw

nung temulung magütsür, saka idaki tan draw indang ajaki kü dang ahia aruogo. Ni teti Serena indang asayatem repranger. Pa den semi-final asayatsü yongyar," ta asemben Grand Slam takok angula Osaka-i ashi.

Taoba Grand Slam asayamung nung Osaka-i quarter-finals tonga asayadang, lai title kokteter aser tan Australian Open nunga lai tanaben takok angutsü teimla nung shilem agidar. 2019 küm Osaka-i mezüing Australian Open asayamung koka lir.

Nüingtu tarep asayar Hsieh-i iba asayamung nung jungaka shilem agia aruogo aser lai junga asayaba den ang ajak den jungtepnüba shisatsü aliba ajanga fans-i la kanga sapuadok. Asayar tejen Hsieh-i tan Grand Slam quarter nung shilem agia Australian Open nung shilem agir rongnung la tantsütüla kümogo.

US Open takok angula,

Osaka-i tesüiba ita 12 tejakdang nungi asaya 19 nung khen danga tamakok ngudanga mali, saka taoba küm tetenzüklen Melbourne Park nung America tsür asayar tasen Coco Gauff-i la tsükdaktsüba sülen asayamung nungi la tukadok.

Tetsür kija asaya quarter-final tanga ka nung Serena Williams-i Romania tsür Simona Halep madak 6-3 6-3 agi takok ngua last four tongtetogo. Australian Open asayamung nung Serena-i semi-final tukubenbuba tongteter alitsü.

Rod Laver Arena nung arishi küm 39 tain America tsür Serena-i seed tanabuba Halep den kanga toktepa asaya aser minute 80 tashi asayar sülen, lai iba asaya koktet. Serena-i 24buba Grand Slam title angutsü asoshi asaya ana nung takok angutsü anünga lir.

Williams, shibai winner 24 den unforced errors 33 angu, 2017 küm lai Australian Open tenetbuba akokba sülen nungi lai tongtibang asayamung ka nung danga takok ngudanga mali aser tan asayamung final tongtettsü atema Osaka den lai semi-final asayatsü.

Ano külen, Halep, shibai taoba küm Australian Open semi-final tongteta aser 2018 küm final nung tamakok ngua liasü, la-a French Open aser Wimbledon nung anaben tashi Grand Slam takok anguba sülen, tasemben buba Slam teimla nung shilem agi, saka tia makai iba asayamung nungi la tsükogo.

India vs England: India-i Test tanabuba kokogo

New Delhi, Tsüklai/February 16, 2021 (Agencies): Mongolbarnü, Chennai nung India nung spin bowler takoktet Ravichandran Ashwin-i India team atema batting aser bowling tsütsü alakteta shilem tajung agiba yong, tanabuba test nung India-i run 317 agi England tsükdaktsü. England aser India tsüingda Test series asaya 4 nungi team anapronglai asaya ka ka kokogo.

Tanabuba Tests tenzüker pezünübuba asaya nung

England team-i run 482 target metongtet. Tanabuba innings nung India nung spin bowler temi shilem tajung agiba ajanga England team run 164 dang yanglur asayar ajak out süadok. Iba den külemi Ashwin-i century ka den wicket 8 agiba ajanga India team pur kanga nungitogo.

Tasemnü asayadang England nung wicket 3 out asü aser anogo pezübuba asaya nung over 35.2 nung England nung tanüngba wicket 7 tashi

out süadok.

Test asaya tanabuba akokba ajanga, India team percentage points 69.7 ngua World Test Championship table nung jenjang tanabubai tuogo aser June ita final nung shilem agitsü asoshi maongka tajung angur. Ano külen, table nung England team jenjang pezübubai luogo. Point table nung jenjang temaba tongteta alir team - New Zealand pur Lord's final atema qualify süogo. Iba final June 18, 2021 nü asayatsü.

ISSF World Cup nung India shilem magitsü

New Delhi, Tsüklai/February 16, 2021 (Agencies): Taküm April ita Changwon kübok ISSF World Cup asayamung nung India-i shilem magitsü. South Korea nung hopta ana quarantine asütsü temzüng dak sendakba nung, iba mapang shooter tem training nung tetsükdaktsü ajurutsü asadanteta India shooter team-i iba asayamung nung shilem magitsü lemtete.

Iba ISSF World Cup, koba International Shooting Sport Federation ajanga agizüka lir, iba shooting asayamung ya Changwon nung April 16 nungi 27, 2021 tashi ayonga asayatsü terenemba lir.

"Anogo 14 tashi quarantine temzüng aliba ajanga Korea nung India shooter temi shilem World Cup nung shilem magitsü. Quarantine mapang shooter tem training agitsü asoshi tetsükdaktsü ajurutsü," ta Hombarnü National Rifle Association of India (NRAI) indang ketdangsür kati ashi.

Korea nung ayonga asayatsü aliba World Cup ya temeyoktep asayamung ka alitsü, kong shooter tem rifle, pistol aser shotgun khashishiba nung tokteptsü.

Ketdangsüri ashiba agi, South Korea tekolakpur tetuyuba nung agüja aliba ama shooter ajak lateta aliba mapang tashi quarantine asütsüla.

India-ia March 18 nungi 29,

2021 tashi New Delhi kübok Dr Karni Singh Shooting Range nung combined World Cup asayamung ayongzüktsü terenemba lir.

Iba asayamung magidang, February 22 nungi March 5, 2021 tashi Cairo nung shotgun World Cup asayatsü.

April 25 nungi 30, 2021 tashi Tokyo yimti kübok National Test Event atema tanga linük den India shooter tem shilem agitsü renemer liasü, saka COVID-19 wara junga süshia maoba ajanga iba asayamung thitsü. Taküm Japan yimtiba Tokyo nung July aser August tsüingda Olympics ayongzüktsü terenemba lir.

Aruya aliba asayamung ajak ya Tokyo Olympics atema renemshiba asayamung ama agitsü.

Tokyo Olympics magidang, June ita Baku, Azerbaijan nung ayongtsü aliba World Cup ya tatembangbuba international tetoktepba asayamung alitsü.

NRAI-i aruya aliba 64th National Championships atema anogo telemsa sangdongogo, koba April 10 nungi tenzüka tesem balala nung asayatsü.

April 14 nungi 29, 2021 tashi Bhopal nung rifle asayamung asayatsü. April 11 nungi 29, 2021 tashi Delhi nung pistol competition aser kasa tesem nung April 10 nungi 24, 2021 tashi shotgun asayamung ayonga asayatsü terenemba lir.

Test tasembuba atema Bairstow aser Mark anisemogo

New Delhi, Tsüklai/February 16, 2021 (Agencies): Ahmedabad nung February 24, 2021 nü nungi tenzüka India den day/night Test asaya atema, Mongolbarnü England test squad nung wicket-keeper Jonny Bairstow aser fast bowler Mark Wood na anisemogo.

Mongolbarnü, Chennai kübok Test series tanabuba nung England team-i run 317 agi India team makok aser iba Test series asaya pezü nungi team anapronglai asaya ka ka kokogo. Asayartem anisüngzükdaktsütsü atema asayar melentepba shilem ama,

selector temi spin bowler aser all-rounder Moeen Ali, shiba tanabuba test nung asayaogo, pa England-i meyipa yokogo. Tawa, Sri Lanka den Test series ana asayaba sülen, Bairstow anisüngzükdakja liasü. Sri Lanka den Test asayaba mapang, Bairstow-i run 47, 35 not out, 28 aser 29

yanglu.

Sri Lanka nung Tests series temer sülen, Wood-a anisüngzükdakja liasü. Mezüing Test asaya nung pai wicket ka danga magi aser tanabuba Test nung pai wicket asem out sütsü.

"Anisüngzüksü atema Moeen Ali England-i aotsü; Jonny Bairstow aser Mark Wood na mezüing Test ana nung shilem magiba sülen, tasembuba test atema squad nung tena denogo," ta England and Wales Cricket Board (ECB) sangdong ka ajanga metetdaktsü.

Aruya aliba Test tasembuba atema England squad nungi Joe Root (c), James Anderson, Jofra Archer, Jonny Bairstow, Dominic Bess, Stuart Broad, Rory Burns, Zak Crawley, Ben Foakes, Dan Lawrence, Jack Leach, Ollie Pope, Dom Sibley, Ben Stokes, Olly Stone, Chris Woakes aser Mark Wood nung asayatsü.

BILEMDANGANG

"Lenir tamajung adokra, yimti nung temoatsü malir."